

L'AN NÒU

Fai tresto cop que vous lou tournan dire:
Bono annado, bèn granado... es toujours sincèr. (Pajo 2)



Prouvènço d'aro

Tóuti li mes, lou journau de la Prouvènço d'aro

Janvié de 2017

n° 328

2,10 €

Tresto an de tèms

Lou 7 de janvié de 1987 pareissié à Marsiho lou proumié numerò d'un journau mesadié en entiè redegè en lengo nosto, pourtant pèr titre "Prouvènço d'aro".

Sa publicacioun èro estado anouciado simbolicamen dins un acamp au Palais dóu Roure en Avignoun, coume s'es di: "à la sousto d'un palais, ounte i'a bèn lèu un siècle, se larguè lou journau maje de Prouvènço: L'Aiòli. Adounc esperan fisançous, que l'esperit sant d'aquéu liò, boufara mai, pèr soun umble eiretié: "Prouvènço d'aro".

Fuguè uno benedicioun, l'auro de gràci nous a pas leissa à court d'alèn, vuei "Prouvènço d'aro" a despassa en nombre de numerò e en durado de tèms lou journau L'Aiòli... mai sènt toujours l'aiet de soun illustre davancié.

Avèn assaja de coumpli lou souvèt de Frederi Mistral qu'aurié vougu vèire naisse un novèu journau, *aquéu journau escri en pur dialèite felibren, noun s'ocuparié dóu Felibrige, mai toucaré en tóuti li questioun poultico, amenistrativo, soucialo, artistico, etc., qu'interèsson la Prouvènço. En un mot, s'enaurant au-dessus de tóuti li partit e se tenènt foro d'éli, cercarié de crea la questioun prouvençalo e lou partit prouvençau. I'a dins aquelo draio quaucarèn de nòu à trouva...*

Avèn assaja de trouba aquelo noveta toujours dins la Prouvènço d'aro, eternalo e atualo. Emai pousquessian pas s'escapa dóu passat, sabèn que l'acioun militanto es toujours davans, pas darré.

L'avian deja di, es mai parié, tres decenio pèr uno lengo es uno tempourado mau assegurado. S'espèro de plouvino benfasènto pèr faire regreia la flour, mai li raisso s'amoulounon, la terro s'embugo, resquiho e emporto lou racinun d'un païs. Fau de vièi roure vo d'òuliviè venerable pèr resista. Sai-que! soun encaro proun noumbrous en Prouvènço.

La resistènci pèr manteni uno lengo demando de s'asata au moude d'aro, à la Prouvènço d'aro, assajan sèmpre que mai!

Mai, pecaire, i'a pas que l'aveni de noste parla que nous pertoco, es tambèn aquéu de la prèso escricho que se vèi aro d'en pertout en chancello.

Es pas gaire facile de legi un article de journau-papié, de mai en lengo nosto, es mai eisa de vèire e d'escouta sènso peno la televisioun parlo-souletto vo de naviga à tuste-balustre sus l'internet moundialisa pèr pesca à bèl èime l'enfourmacion estandar-disado qu'agrado en tóuti emé la tableto vo lou telefone en man...

Basto, aro, nous-autre, pèr countunia, anan assaja vèire de jouga au tresto-quaranto, aquéu vièi jo d'asard que fasié flòri en Prouvènço à passa-tèms.

Bernat Giély

Bancado marsiheso



Lou Coulège dóu Roy d'Espagno de Marsiho, vèn d'agué la labelisacioun UNESCO pèr son banc de mousaïco. Aquéu grand banc couloura fai 70 m de long sus la Courmisso.

La Calandreto Gapiano

La *Calandreta Gapiana* perseguis un camin qu'es pas eisa. Mai, mau-grat lis auvàri, lis ensi-gnaire e li parènt soun tout plen d'espèr que la segoundo classo vèn d'espeli!

Despièi la rintrado, la direitriço Dono Chedeville, asseguro la classo di grand siegue 14 calandroun. Soun salàri es paga pèr l'Estat.

Dono Pasturel, tout bèu just sourtido dóu Centre de Fourmacion APRENE se cargo di 20 enfant de meirenalo. Pèr lou moumen, soun salàri es paga pèr l'assouciacioun. Emé 34 enfant, lou segound poste devrié èstre pres en cargo pèr l'Estat!

La segoundo classo fuguè amenajado à l'estanci dins l'ancian apartamen de l'ensegnaire de l'escolo, en grando partido pèr li parènt e lis ami de l'escolo. Lou chantié fuguè di gros: poustan, sòu, caufage, escalé de secous, pinturo e croumpo de moubilié nòu. La court sara agrandido au printèms o à l'estiéu venènt.

La *Calandreta Gapiana* durbiguè en novèmbre 1995.

Pamens, emé lis amenajamen, lou segound salàri, la demenido di suvencioun de la Federacioun Regiounalo nous meton en dificulta.

Se nous poudès ajuda, tant mou-lalamen que financieramen, nous

permetra d'èstre mai seren. Se sias impoussable, la douno que poudès faire vous baio dre à-n-uno reducioun sus lou mountant de vòstis impost sus lou reven-gut.

Aquesto annado, prepausant un agenda e un armana.

- L'agenda (fourmat 15 x 10), chasco semana es presentado sus 2 pajo en vis-à-vis, emé un calendrié dóu jardinié, d'espres-sioun comentado e divers entre-signe. Sa cuberto es en coulour emé uno fotò de l'escolo, la reli-gaduro de metau: 5 eurò.

- L'armana (fourmat 21 x 14,5) comto un quarantenau de pajo emé de tèste en aupin (conte,

recèto, pouèmo, cant), la cuberto en coulour emé uno fotò de l'es-colo. 5 eurò.

Vous gramaciant d'avanço e vous souvetan uno tras que bono annado 2017.

Andriéu Faure

Présidènt d'ounour de la Calandreto

Les Amis de la Calandreto Gapiana

87, Hameau de St-Jean -
05000 Gap -
04.92.24.97.62.

Lengo regiounalo de Franço

Pas de ratificacioun de la Charto éuropenco, mai uno proupousicioun estudiado...

Pajo 2

Nouvèlo Marcho di Rèi

Coume avèn leissa li presènt de la crècho pèr ana aganta la favo ?

Pajo 12

Lou diciounàri Moirenc

Lou bèu raconte de la descu-berto dóu manuscrit pèr Jan-Michèu Jausseran...

Pajo 7